



Komunikadu Imprensa

08 Agostu 2019

JSMP konsidera alterasaun husi krime violasaun ho agravasaun ba fali krime abuzu seksuál ba ema ho defisiénsia la apropriadu

JSMP konsidera desizaun Tribunál Distritál Suai ba kazu abuzu seksuál hasoru vítima ema ho defisiénsia ne'ebé decide iha 05 Marsu 2019 la adekua tanba alterasaun ne'e rezulta desizaun ne'ebé kmaan loos ba kondenadu mezmu tribunál hatene katak lezada sofre kondisaun vulnerável ba defisiénsia fízika no psíkika.

Tribunál falla atu elabora no konsidera faktu relevante sira iha kazu ne'e, nune'e rezulta sentensa tinan lima de'it. Sentensa ne'e la apropriadu no la ekilíbriu ho krime ne'e ninia gravidade.

Bainhira tribunál mantein artigu 172 KP kona-ba violasaun seksuál no artigu 173 (letra c) KP kona-ba agravasaun tuir akuzasaun prokuradór nian no avalia faktu no sirkunstánsia sira ho apropriadu, sei asegura sentensa ne'ebé proporsionál no ekilíbriu ba kazu ne'e. Tanba krime violasaun seksuál ho agravasaun nia moldura penál husi tinan 5 to'o 20 prizaun. Enkuantu krime abuzu seksuál ba ema ne'ebé labele reziste nia moldura penál entre tinan 4 to'o tinan 12 prizaun.

Provizaun referidu hirak ne'e (Art. 172 KP no 173 letra c KP), sei permite tribunál atu fó pena ne'ebé ekilíbriu ho lezada ninia sofrimentu tanba arguidu aproveita situasaun no sirkunstánsia vulnerabilidade lezada nian hodi satisfaz nia-an. Aleinde ne'e, arguidu nu'udar membru família ne'ebé tuir loloos tenke proteje lezada, la'os pelu-kontráriu komete krime hasoru lezada.

"Kazu ne'e hatudu problema sériu kona-ba autór judisiáriu sira nia-sensibilidade ba kazu sira envolve ema ho defisiénsia. JSMP hanoin katak autór judisiáriu sira prezisa simu/hetan formasaun ba kazu sira envolve ema ho desifiénsia no violénsia bazeia jéneru, atu iha koñesimentu ida-ne'ebé kle'an ba kazu sira ne'e," dehan Diretór Interinu JSMP, Casimiro dos Santos.

Iha faktu no sirkunstánsia estra-ordináriu ne'ebé envolve iha kazu ne'e no tuir loloos tribunál tenke avalia ho kuidadu no prudente ba faktu sira ne'e inklui lezada nu'udar ema ho defisiénsia fízika no psíkika, abuzu relasaun familiár entre arguidu no lezada no liuliu arguidu aproveita lezada ninia situasaun vulnerabilidade sira.

Faktu sira ne'ebé prodús durante julgamentu hatudu katak krime ne'e konsumadu. Embora arguidu hapara tiha nia aktu ne'e, maibé la'os tanba arguidu konsiente katak tuir loloos nia (arguidu) la merese halo relasaun seksuál ho lezada ne'ebé sofre kondisaun no limitasaun fíziku

no psíkiku oioin. Maibé tanba arguidu haree katak lezada sofre ran bainhira arguidu halo hela aktu ne'e hasoru lezada.

JSMP la fiar katak ema ida ho sirkunstánsia no limitasaun oioin hanesan lezada bele iha kapasidade/koñesimentu no konsiénsia natoon atu fó-ninia konsentimentu hodi halo relasaun seksuál ho livre no vontade. Hanesan haktuir iha akuzasaun prokuradór nian katak hafoin akontesimentu ne'e lezada la sente hakmatek no laran susar. Tanba ne'e lezada manifesta ninia depresaun no trauma ne'e liuhosi tanis hasoru nia alin na'in rua no fó-hatene kedas akontesimentu ne'e ba nia alin na'in rua. Iha situasaun normál kuandu ema ruma deside ho vontade no konsentimentu livre atu halo relasaun seksuál, ema ne'e nunca sei hakarak divulga relasaun seksuál ne'e ba ema seluk.

Tribunál tuir loos tenke avalia no konsidera faktu sira no sirkunstánsia hotu-hotu antes halo alterasaun. Tribunál mós tenke apresenta péritu tuir artigu 149 no artigu 150 (2) KPP atu esklarese ka konfirma relatóriu médiku ne'ebé iha ona nune'e bele ajuda kontribui prova ruma hodi hametin juis nia konviksaun tanba defeza apresenta dúvida kona-ba rezultadu relatóriu médiku refere.

Antes ne'e, Prokuradór akuza katak iha 16 Outubru 2017, arguidu ba iha lezada nia uma atu hamutuk ho lezada nia inan-aman ba partisipa serimónia kultura iha família balun ne'ebé viziñu ho lezada sira. Arguidu ba iha lezada nia inan-aman tanba arguidu nia feen nia tiun mak lezada nia aman. Hafoin partisipa tiha seremónia ne'e, arguidu fila uluk mai uma no haree lezada tuur hela ho nia alin na'in rua iha sala vizita. Arguidu fó osan US\$ 0.50 ba lezada nia alin na'in rua ne'e no haruka ba sosa sigaru iha kioske ne'ebé ho distánsia maizumenus metru 20.

Depoisde lezada nia alin na'in rua ba tiha, arguidu taka tiha odamatan oin no arguidu hahú hasai nia roupa no la'ó besik ba iha lezada nia tuur fatin no hatoba lezada ba simenti, hafoin halo relasaun seksuál ho lezada ne'ebé ho kondisaun sofre defisiénsia fízika no psíkika. Lezada tanis no hakilar maibé arguidu taka netik lezada niaibun nune'e lezada nia lian la sai no arguidu hateten ba lezada katak nia hakarak halo relasaun seksuál ho lezada. Bainhira halo hela relasaun seksuál ne'e, arguidu haree ran sai hosi lezada nia orgaun seksuál, nune'e arguidu husik hela lezada no halai sai kedas hosi lezada nia uma.

Bainhira lezada nia alin na'in rua fila hosi kioske, sira haree lezada tanis hela. Lezada konta sai arguidu nia hahalok ba nia alin na'in rua no sira fó-hatene kedas ba sira nia inan-aman. Konsekuénsia hosi arguidu ninia hahalok ne'e rezulta lezada sofre moras iha orgaun seksuál no trauma.

Prokuradór akuza arguidu kontra artigu 172 KP kona-ba violasaun seksuál no artigu 173 (alinea c) KP kona-ba agravasaun ba ema inkonxiente ka inkapáz.

Durante julgamentu, arguidu nega faktu balun iha akuzasaun katak nia la fó osan US\$0.50 ba lezada nia alin na'in rua hodi ba sosa sigaru. Arguidu deklara katak nia halo duni relasaun seksuál ho lezada maibé ho lezada nia konsentimentu. Arguidu hatutan katak sira ida-idak mak kolu rasik sira nia rounpa maibé bainhira arguidu halo relasaun seksuál ho lezada, arguidu haree katak lezada sente moras nune'e la konsege kontinua halo relasaun seksuál ho lezada. Maibé arguidu uja ninia liman fuan hatama ba iha lezada nia orgaun seksuál durante minutu rua no arguidu haree ran iha arguidu nia liman fuan. Tanba ne'e arguidu hatais fali rounpa no fila-fali ba iha fatin seremónia kultura. Hafoin la to'o minutu balun, arguidu rona lezada nia família buka arguidu atu baku tanba lezada tanis la para.

Prokuradór konsidera arguidu provadu komete krime tuir faktu sira iha akuzasaun liuliu arguidu aproveita lezada nia kondisaun inkapáz no vulneravel tanba defisiénsia fíziku no psíkiku. Tanba ne'e husu ba tribunál atu aplika pena prizaun tinan 16, maibé se tribunál iha hanoin seluk, husu ba tribunál atu aplika 12 prizaun.

Entretantu defeza husu ba tribunál atu fiar ba arguidu nia deklarasaun katak arguidu la halo relasaun seksuál ho lezada, maibé hatama de'it liman fuan ba lezada nia orgaun seksuál. Defeza mós dezafia relatóriu médiku tanba la deskreve kona-ba raan no kanek iha lezada nia orgaun seksuál.

Defeza konsidera arguidu nia hahalok ne'e hanesan tentativa violasaun seksuál. Tanba ne'e husu ba tribunál atu halo alterasaun hosi violasaun seksuál ho agravasaun ba fali Artigu 23 KP kona-ba tentativa no konsidera situasaun ne'e hanesan sirkunstánsia atenuante estraordináriu hodi husu suspensaun ba pena prizaun.

Hafoin rona faktu sira hotu ne'ebé prodús iha julgamentu, tribunál halo alterasaun jurídika hosi krime violasaun seksuál ho agravasaun ba fali krime abuzu seksuál ba ema ne'ebé labele reziste (179 KP).

Tribunál prova katak arguidu halo relasaun seksuál ho lezada maibé la konsege tanba lezada sente moras. Maibé depoisde ne'e arguidu hatama fali nia liman fuan klaran ba lezada nia orgaun seksuál to'o ran sai no aktu ne'e halo hasoru lezada ne'ebé ho kondisaun sofre defisiénte fízika no psíkika. Arguidu nia hahalok halo lezada sofre moras iha orgaun seksuál no sente trauma. Bazeia ba faktu no konsiderasaun hirak ne'e, tribunál konklui prosesu ne'e no kondena arguidu ho pena prizaun tinan lima (5).

Kazu ne'e rejistu iha tribunál ho Nu. Prosesu: 0019/17. BBATB ne'ebé prezide hosi juis koletivu Dr. Argentino Luisa Nunes, Dr. Álvaro Maria Freitas no Dr. Benjamin Barros. Prokuradór reprezenta hosi Dr. Ricardo Godinho Leite no arguidu hetan defeza hosi Dr. Manuel Amaral hosi Defensória Públiku.

Atu hetan informasaun liután favor kontaktu direktamente:

Casimiro dos Santos

Diretór Interinu JSMP

Diresaun e-mail: casimiro@jsmp.tl

Telefone: 3323883 | 77257466